



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI
DREJTORIA E HETIMIT ADMINISTRATIV

Nr. 63/2 prot.

Tiranë, më 25. 01. 2023

V E N D I M

Nr. 16, datë 25. 01. 2023

Mbështetur në nenin 32, pika 1, gërma a), të ligjit nr. 10 221, datë 04.02.2010 “Për Mbrojtjen nga Diskriminimi”, të ndryshuar, pranë Komisionerit për Mbrojtjen nga Diskriminimi është regjistruar ankesa me nr. 08, datë 11.01.2023, e D. F. kundër Bashkisë Korçë dhe Këshillit Bashkiak Korçë, me pretendimin për diskriminim, për shkak të racës¹, gjendjes ekonomike² dhe gjendjes civile³.

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna, subjekti ankues në mes të tjerash informon se: “...Jam i divorcuar me dy fëmijë të cilët janë nën kujdestarinë time. Jetoj me nënën time e cila është e verbër dhe prej saj përfitoj pagesë kujdestarie. Jam i papunë dhe nuk marr ndihmë ekonomike sepse më kërkohet të regjistrohem si punëkërkues i papunë, ndërkohë që unë jam shoqëruar i nënës time, gjë e cila më pengon që unë të punoj dhe të siguroj të ardhura të tjera në familje. Kam dy fëmijë të moshës 11 dhe 8 vjeç. Të dy fëmijët janë nxënës në shkollën 9 vjeçare “Asdreni”. Mbështetur në VKM nr. 511, datë 27.7.2022, “Për përfitimin e bursave të pagesave për nxënësit e arsimit parauniversitar”, të ndryshuar, kam aplikuar pranë Ndërmarrjes së Shërbimeve Mbështetëse të Arsimit dhe Çerdhes, Bashkia Korçë, duke dorëzuar të gjithë dokumentacionin përkatës dhe tani më thonë që nuk je përfitues. Arsyen nuk e di. Ndërkohë që fëmijët e mi me vështirësi të madhe

¹ Referuar Vërtetimit Nr. 501 prot., datë 10.01.2023, të lëshuar nga Organizata “Unioni Egjiptianët e Shqipërisë”, ankuesi i përket komunitetit egjiptian në Shqipëri.

² Referuar Vërtetimit të lëshuar nga Drejtoria e Kujdesit Social, Bashkia Korçë, datë 10.01.2023, ankuesi është kujdestari i shtetas D. F., me aftësi të kufizuara.

³ Referuar Certifikatës Familjare datë 09.01.2023, ankuesi rezulton i divorcuar.

ekonomike i çoj në shkollë që të edukohen dhe të arsimohen. Po u drejtohem ju si institucion që të më zgjidhet problemi pasi shoh që kudo ku kam shkuar nuk më hapen dyert dhe më diskriminojnë duke mos më dhënë qoftë dhe një mundësi për të më shpjeguar arsyen. Listat janë miratuar me vendimin e Këshillit Bashkiak, i cili u mblodh në datë 28 dhjetor 2022”.

Subjekti ankues, kërkon nga Komisioneri për Mbrojtjen nga Diskriminimi, konstatimin e diskriminimit të tij nga ana e Bashkisë Korçë dhe Këshillit Bashkiak Korçë, për shkak të racës, gjendjes ekonomike dhe gjendjes civile, si dhe përfshirjen e fëmijëve të tij në listën e përfituesve të VKM-së Nr. 511, datë 27.7.2022 (e ndryshuar), *“Për përfitimin e bursave të pagesave për nxënësit e arsimit parauniversitar”.*

II. Ndjekja e procedurës për shqyrtimin e ankesës nga Komisioneri.

Hapat proceduralë të ndjekur nga strukturat përkatëse të Komisionerit për Mbrojtjen nga Diskriminimi, paraqiten si më poshtë vijojnë:

Pas analizimit paraprak të ankesës nr. 08, datë 11.01.2023, të bërë nga D. F., u konstatua se nga pikëpamja formale, ajo i plotësonte kërkesat e parashikuara nga neni 33/3 të ligjit 10221/2010 *“Për Mbrojtjen nga Diskriminimi”*, të ndryshuar. Në këto kushte Komisioneri, filloi procedurat përkatëse për shqyrtimin e saj.

1. Me shkresën nr. 63/1 prot., datë 17.01.2023, Komisioneri për Mbrojtjen nga Diskriminimi, ka njoftuar dhe kërkuar informacion nga, Bashkia Korçë dhe Këshilli Bashkiak Korçë, lidhur me pretendimet e ngritura në ankesën e bërë nga D. F.

Më datë 24.01.2023, ankuesi është paraqitur pranë Zyrës Rajonale të Komisionerit për Mbrojtjen nga Diskriminimi Korçë dhe ka depozituar një shkresë duke kërkuar pushimin e ankesës, për përfitimin e bursave për fëmijët e tij, pasi ata u bën pjesë e listës falë ndërmjetësimit të strukturave të Komisionerit.

Në këto kushte, Komisioneri vlerëson se qëllimi për të cilin ishte filluar hetimi administrativ është përmbushur në thelb, dhe në referencë të nenit 33, pika 9, të ligjit 10221/2010 *“Për Mbrojtjen nga Diskriminimi”*, të ndryshuar, ku parashikohet se: *“Kur e sheh të përshtatshme, Komisioneri kërkon të arrijë marrëveshje pajtimi mes ankuesit dhe personit kundër së cilit është paraqitur ankesa”*, KMD vlerëson se është arritur efektiviteti dhe qëllimi për të cilin ishte iniciuar ankesa.

Në nenin 90/3 të Ligjit nr. 44/2015 *“Kodi i Procedurave Administrative të Republikës së Shqipërisë”* parashikohet përfundimi i procedurës administrative: *“Procedura administrative, e nisur me kërkesë apo kryesisht, deklarohet e përfunduar pa një vendim përfundimtar për çështjen, në rastet e parashikuara në nenet 93-96 të këtij Kodi. Deklarata e përfundimit të procedurës administrative, pa një vendim përfundimtar për çështjen, përbën akt administrativ”.*

Njëkohësisht, në referencë të nenit 94/1, të ligjit nr. 44/2015 “Kodi i Procedurave Administrative i Republikës së Shqipërisë”, i cili parashikon se: “Si rregull, në procedurën administrative të nisur me kërkesë, organi publik deklaron përfundimin e saj pa një vendim përfundimtar për çështjen, nëse pala që ka paraqitur kërkesën e tërheq atë”, Komisioneri deklaron përfundimin e saj pa një vendim përfundimtar.

PËR KËTO ARSYE:

Mbështetur në nenin 90/3 dhe 94/1, të ligjit nr. 44/2015 “Kodi i Procedurave Administrative i Republikës së Shqipërisë”, nenin 1, nenin 7, pika 1, neni 20 dhe 21, pika 1, nenin 32, pika 1, germa a) e nenin 33, pikat 9-10, të Ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi,

V E N D O S I:

1. Të deklarojë të përfunduar procedurën administrative për shqyrtimin e ankesës nr. 08, datë 11.01.2023, të D. F., pasi është arritur efektiviteti dhe qëllimi, për të cilin kishte filluar procedura hetimore.
2. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijeni.

KOMISIONERI

Robert GAJDA

(Shkaku: Raca, gjendja ekonomike dhe gjendja civile)
(Fusha: Të mira dhe shërbime)